



ANÉT, D'ÀUTREFOES, DEN LE MARA CHÉ LÉS HUTIAES

Serge m'enmene au péyis daus hutiaes, devér La Tallàie. Su lés levàies, lés hutes environnant le « grand mara » qui fasét bé d'autrefoes mae de onze cents éctares, avéc lés comunàus de La Tallàie (350 éc.), de Voullàe (250 éc.), dau Langun (270 éc.), dau Poeràe (250 éc.). Anét, çhés comunàus qui nijhiant tots lés ivérs, avant étai aburais pi labourais pr être enblavais de mayis. O rechte 32 éctares de pati comunàu su La Tallàie, é tot de maeme, 250 éctares su le Poeràe. Mé le mara ét pu le mara. É lés prmàes hutiaes trouvériant pu sement lés rouseas pr muntàe leùs hutes, queme quant al étiant daus vraes hutes, daus lojhes. É çhés que me parle

Serge, daus hutiaes d'ol at céncante ans, le vivriant pa ghére dau mara d'anét. L'ome, ol étét la pàeche, la chace. La fame, ol étét troes quatre vaches, in soulas d'oaes, in petit jhardrin. O vivét su soe, entr soe. In petit de çulture, d'afiajhe, mé bérède de chace, de pàeche : o rapele le tenp dau néolitique, l'ajhe de la coulléte.

Serge me cundit a la hute daus troes foussais entr le

comunàu de La Tallàie pi çchau dau Langun, voure o quemence la Cénture daus Holandaes. Étét la hute au pére Bllanchét. D'autres sant encore daus demeürances préncipales ou de lési, mé çhéle-çhi chérat bétout en botes. Queme trtotes, a cunte d'in coutai la granjhe ou le tét daus bàetes é de l'autre, den le ménme bâtiment, la mésun. Den le tét, qu'ét pavai, i voeyun lés crches é lés ataches daus

Sivéz pajhe 2



Ine « hute »

Den çchau limérot :

- La lojhe en rouseas...2
- La chace pr vivàe...3
- Aus nélesaes, J. Garin...4-5
- Bouses é bousétes...6
- Gabi, le fasour de bouroles...7
- « Booth » é « bot »...7
- Le marichàu ...8

site de la pajhe 1

vaches, quatre cenc vaches qu'ol avét. Den la mésun, ine petite cheminàie en péres tallàies. De la pére bllanche qui, queme çhéle daus murs, venét dau coutea entr Voullàe é La Tallàie, ine anciéne ile au temp que l'aeve salàie de la mér renplissét lés baesses. Lés batissours aliant queri la pére avéc daus bateas. Çheù qui rechte daus prmères hutes – çhéles que lés hutiaes muntiant en ine nèt pr qu'o fumisse a l'écllérzie, é que le batissour de nèt devéghisse prpriétaere au soulall– o sant lés rouseas, lés rouseas latais de la toecture. La couvèrture ét en teùblles, mé la chanlate en rouseas, daus



Andrai, fall de hutiaie

rouseas qui se copiant den le mara, in coup que lés feùlles étiant chétes en jhanvràe ou fouvràe.

Andrai, in fall de hutiaie de La Tallàie, se rapele que l'étiant sis den leù hute : quatre gas, le pére, la mère. Ol avét in lét aus quatre coéns. A la grand aevàie de 1936, ol at rén que la mésun qu'at pa nijhai. Le fasiant in soutre de fagots pr debas lés bàetes pr lés remuntàe. Le vétérinaere qui savét pa de pigoullàe venét voer ses pratiques en batea a moteùr. O s'avét pa encore vu de batea a moteùr ! Den daus endréts ménme le fouàe étét nijhai : l'alumiant le feù den le chaudrun !

Lés hutiaes passiant pr daus mundes d'étranjhe ; veniant all pa daus « colliberts », daus Sarmates, de pépilles sauvajhes ? Çhés qu'écrivirant çheù étiant mae idayous que fins. Mé ol ét bé vrae que lés Marouins voeyiant lés hutiaes queme daus mundes pa parélls, daus mundes qu'aviant leùs idàies, leùs façuns. Andrai me dissit que lés çhuraais aviant pa tout plén de pratiques ché lés hutiaes, pi que lés missiuns pi lés missiounaeres en chanjhirant pa

ghére. Mancant pa çhéles-la qu'étiant entérais cévilement. T'aràes pa vu de chapelét ni de croes avéc in ramea den ine hute. Le pére B., li, at jhamae rentrai den ine église, qu'o séjhe vivant ou en corp.

A La Tallàie, voure lés hutiaes étiant beacop, le demandirant en 1906 de sortir de Voullàe é de passàe comune. D'apràe que Clémencea o z-at bé velu, mé a la cundiciun qu'o se fasisse pa d'église a La Tallàie. O se muntit quant ménme ine chapéle en 1956. Andrai pi sés camarades de la musique furant demandais pr étrnàe la chapéle. Mé pa yin velit y alàe ! Pr lés cent ans de la comune, o se chantit çhéte annàie 2006, davant le monument aus morts, la chançon cunpousàie en 1906 pr Éloi Séguinot. Ine chançon vrae républicaene ! é vrae anticllérjhounne ! voure ol ét de quesciun « Du monstre noir enfin vaincu », aprae la loe de Séparaciun de 1905. É le refrén de la fin dit : « Haut les cœurs, citoyens ! / Marchons vers / L'avenir ! / Des cléricaux, à tout jamais, / Le règne vient de finir. »

Micha

LA LOJHE EN ROUSEAS

Gérard ét den le mara depis l'ajhe de uit ans. Sun pére avét pris ine cabane au Poeràe su la pllaene. Le se rapele que l'aliat a la vellàie ché lés hutiaes. Le jousiant a la mouche davant in feù de bouses. Gérard at trouvai ine fame den le mara. Sun beafrere Constant li at fét voer queme o se fasét ine late de rouseas. Ét de maeme que Gérard at devenu l'énjhénior de la lojhe de la Mésun dau Petit-Poetou a Challaè. En 2006, la comune de la Tallàie li demandit d'en faere yine pr lés cent ans de la comune. Avant lés mésuns en pière, encore anét apelàies hutes, lés hutiaes deviant demèuràe den daus mésuns de rouseas qui senblliant a ine lojhe de ménme. ■



Ine lojhe, queme lés anciénes mésuns daus hutiaes